

■ COLUMNA

Caos en cuschina

DA BRUNO BLOGG

Nundumbravilas èn las baras, sturnidas u sa-jettadas, violadas, strangladas u tissientadas, di per di ed emna per emna sa preschentan plunas victimas inventadas en la televisiun. La qualitat dals mortoris sco l'entira retschertga inscenada da la polizia sa sbassa cun mintga bara supplementara. Perquai hai jau chattà in nov divertiment televisiunaric, numnadamain quel da las emisiuns da cuschinar. Las datas d'emissiun possedan in impurtant plaz en mia agenda. Mai fascinescha la luccadad da cuschinieras e cuschinunzs, da moderaturas e moderaturs che zavràn las ingredienzas, truschàn las tschaveras cun palesar e filosofar davart la vita da mintgadi, davart gronds e pitschens pensiers. Il mussament dad ina creatividad absoluta da prender in zichel da quai e da tschai, truschar in pau qua ed in pau là ed enfin che l'emprima tratga coia en furnel tanscha il moderatur gia il det en il dessert bunamain finì. A la fin da la cuschina da la televisiun resta in cler basegn corporal, quel d'avair fom.

Cuschinar sez è dentant in pau in'otra sfida.

Gist perquai che l'esperienza davant la platta nun è gist gronda. Stuairentant fa pudair e per cletg porscha l'internet tuttas infurmaziuns relevantas per metter ina tratga acceptabla sin maisa. Exact sin il termin ch'il figl turna da scola cun il venter plain fom. Cudeschs da cuschinar èn ozendi danvanz, l'iphon bain piazzà porscha las infurmaziuns necessarias da la tschavera googlada. Da la luccadad dal cuschinar en la televisiun è mia realitad avant la platta anc lunsch davent. Coordinar il temp cun brassar la charn, coier tartuffels, preparar la salata, metter a maisa è anc adina betg optimal. Temp da filosofar hai jau zunt nagin. Cuntunt betg cun mia buna vischina che telefonoscha gist 20 avant las dudesch, dal temp nua mes stress sa chatta sin il punct culminant. Nunpussaivel da guardar las indicaziuns dal recept cun telefonar, in maun resta bloccà, il radius d'acziun dal cuschiner restrenschi. «Na, sas ti betg telefonar cun il telefonin tranter spatla ed ureglia.» Mia vischina dat buns cussegls. «Sas, ina dunna sa far almain trais chaussas en ina, tge cuschinas?» Jau hai explitgà a mia vischina da gist sa fa-

tschentar cun la sosa alva, d'avair laschè luar il paintg e mess tier farina, truschà, pri davent il paintg cun la farina e laschè buglir il latg en la chazetta ed agiuntà puspè il paintg cun la farina cun truschar cuntinudamain. «Stos dar adatg, quai dat gnocs!» Da gnocs eri scrit nagut en l'internet. «Sas, quellas sosas alvas sans cumprar en il Coop.» Quai è stà il davos cussegldà mia vischina, mes telefonin è sa distatgà d'ureglia e spatla ed è crudà en la sosa. Smaladicziun, smaladida.

Malgrà tuttas malempernaviladas e tut ils incaps è la tschavera sin maisa. Tut è pront, sulet il figl n'è betg denturn. En relaziun sco tia tschavera sa sfardenta sin maisa u sa lavaga en la chazetta crescha tia gritta da minuta tar minuta. «Oh sas, la scolasta n'ha betg laschè nus aduras or d' scola.» Cler, la scolasta n'ha nagina famiglia e va a magliar en l'ustaria. Mes figl ha tuttina laschè gustar senza commentaris. El ha senti mia tensiun interna curt avant l'explosiun. Suentar in temp è il commentari tuttina vegni. «Bab, es ti inamurà?» «Häh!» «Ti cuschinas il davos temp cun in pau bler sal.»